

L'autonomia e la mendranzes

Tel cedeàn de la cordanza Degasperi Gruber, ai 5 de setember, la Provincia de Trent ge à dat n post de onor a sia mendranzes linguistiches



La Procuradora del Comun general Elena Testor e l Conseier provinzièl ladin e Assessor regionèl a la mendranzes Bepe Detomas, con la mondura ladina, con i Presidenc de la Provincia Ugo Rossi, del Consei provinzièl Bruno Dorigatti e del Consei de l'autonomies Paride Gianmoena. Tedò, i ombolc de Fascia.

Trent à festejà la Dì de l'Autonomia

La Provincia de Trent ge à dat lèrga a la mendranzes te l'event endrezà per recordèr l 69° cedeàn de la sotescrizion de la cordanza Degasperì Gruber e rabadir valor e significac de noscia spzialità

Trent - Te tempes che l'autonomia spezièla del Trentin Sudtirol vegn metuda tras en discusion, l President de la Provincia de Trent Ugo Rossi à volù meter sun desch, te la Dì de l'Autonomia, n "tris" de peis: la mendranzes ladina, mochena e cimbra, a testimonièr la rejons storiches de l'autonomia, i joegn a moscèr la prospetives per l davegnir, l giornalist e storich Paolo Mieli a ge dir a duc che noscia autonomia no l'é n privilegio. Mieli l'à recordà l pericol de conflic che nasc a no respetèr autonomies, identità e desferenzenzes, l'à uzà fora l valor de na autonomia che cogn esser reinventèda di per di e l'à dit che la gestion de l'autogoern te nosc raion la é più che bona e se zachei met en discusion l'autonomia l'é percheche ge é semper stat insegnà na vijion de la storia massa nazionalista e percheche paon l cont

de na gestion da l'autonomia n muie manco virtuosa fata da autra Regions, desche la Sicilia.

Te chest chèder i ladins é stac protagonisc jà dal scomenz: la dì se à avert defat con la notes e coi colores de la Musega Auta Fascia che à defilà adum con l'autoritèdes de Trent e de Fascia dedant a la sentes istituzionèles.

Dapò a ladins, mochegn e cimbres ge é stat amò resservà n post de onor te la bela sala Depero, olache se à podù scutèr i intervenc di Presidenc del Consei Provinzièl Bruno Dorigatti e del Consei de la Autonomies Paride Gianmoena e del President de la Provincia Ugo Rossi che à rejonà del besegn de empiegnir de contegnui noscia autonomia, con pascion da pèrt de duc e con capacità de vardèr sorafora i confins. Amò na prospetiva sul davegnir é stata

portèda dal bel intervent del joen Nicola Pifferi, President de la Consulta provinzièla di Studenc, dant da la jà recordèda "lectio magistralis" de Mieli.

L'esposizion de na mendranza "viva"

Dò la pèrt ofiziala, la jent à podù jir a veder dut l Palaz de la Provincia, che é restà avert dut l di ai sentadins. Chiò ge é stat lascià gran lèrga a la esposizioni de ladins, mochegn e cimbres, endrezèdes travers l Servije mendranzes linguistiche de la Provincia vidà da Marilena Defrancesco e de gra a la colaborazion con l Comun general, l'Istitut cultural ladin de Fascia e i Istitut mochen e cimber.

Te l'entrèda del palaz à troà lèrga tulins sul tem del trilinguism e su la storia e la situazion de la trei

mendranzes linguistiche del Trentin, e te la sales l'é stat metù fora libes e publicazion, moscià video e filmac per gregn e picoi, se à podù veder e scutèr audio-video libes e conzerc per ladin e cognoscer etres prodoc multimediei e aplicazioni tecnologiches. Ju bas, sot i bie reouc de la sala Wolf, la mendranzes ladina, mochena e cimbra à moscià enzeze i fruc de si talenc de èrt e artejanat, con chèdres, recames e con la mèscre del carnascèr fascian e la faceres zipièdes tel legn da Feliciano Costa Parolot.

La Dì de l'Autonomia se à serà sù a Trent con l gran suzez ladin de l'opera de teater e musega "Cendrejina" de la Scola de Fascia, portèda dant al teatro Sociale, spieie de na mendranza ladina viva e feruscola, che pel vardèr al davegnir con gaissa e otimismo. (lg)



Te la bela Sala Depero ence i raprejentanc de la istituzions de Fascia à podù scutèr i intervenc del President Ugo Rossi, del giornalist Paolo Mieli e di etres reladores.



La Musega Auta Fascia à avert la Dì de l'Autonomia a Trent.



L Palaz de la Provincia é restà avert dut l di a la jent e l ge à dat lèrga a esposizioni de la mendranzes.

